

50՝ քննութեան տակ, 61 տեղափոխուած զանազան բանտեր և 5՝ արտաքուստ Հայաստանից: Արտակարգ դատարանները ոմանք շփոթում են «չէկա»-յի հետ, որ բոլորովին սխալ է: Արտ. դատարանը զուտ դատաստանական ատենան էր, միայն պարզացուած գործավարութեամբ և մահապատժի իրաւունքով: Նրա դերն էր արագ դատավարութեամբ պայքարել պետական դաւաճանութեան և չարաչահութեան դէմ: Երևանի արտ. դատարանի կազմն էր — Նախագահ՝ Բ. Յ. Տէր-Դաւթեան, անդամներ՝ Ա. Արեղեան և Բ. Յ. Մելիքեան, դատախազ՝ Խ. Թիւթիւնճեան: Մինչև յուլ. 15 Երևանի արտակարգ դատարանը 41 հոգի արտաքսեց Հանրապետութեան սահմաններից: Ալեքսանդրապոլի արտակարգ դատարանի նախագահն էր Գ. Վարչապետանը, դատախազ՝ Բ. Բ. Բաղդասարեանը: Արտակարգ դատարաններ կազմուեցին և Կարսում, Դիլիջանում, Նոր-Բայազետում: Բոլշևիկները անհեթեթ լուրեր էին տարածում նրանց մասին: Յուլ. 6-ին Մոսկուայի ռադիօն հեռազրուում էր «ամենքին, ամենքին, ամենքին», որ Երևանի արտակարգ դատարանում դատուած են 22 կոմունիստներ, որոնցից 2 հոգի դատապարտուած է մահուան, 4 հոգի՝ ցմահ տաժանակիր աշխատանքների և որ, իրր թէ, դատավարութեան օրը տպարանական, երկաթուղային և այլ ձեռնարկութեանց բանտրները բողոքի գործադուլ են արել: Մոսկուայի մի ուրիշ ռադիօ հաղորդում էր, որ Կարսի շրջանում գնդակահարուած են 100ից աւելի կոմունիստներ: Աւելորդ է ասել, որ երկուսն էլ շինծու էին:

Արտակարգ պայմաններում արդարադատութեան նախարարութիւնը զբաղում էր երկրի դատաստանական գործի կարգաւորումով: Նախարարութեան կից գործում էր մասնագէտների մի յանձնաժողով օրէնքների հայացման, նոր օրէնքների մշակման, դատաստանական բառակազմ ու բառարան խմբագրելու համար: Օգոստոս ամսին Հայաստանի ամբողջ դատաստանական գործը արդէն՝ վերից վար՝ ազգայնացուած էր: Օգոստոս 18-ին հանդիսաւոր կերպով բացուեց Կարսի Շրջանային Դատարանը՝ Հ. Մելքումեանի նախագահութեամբ և Կայեալեանի դատախազութեամբ, որով Հայաստանը ունենում էր երեք շրջանային դատարաններ—Երևանի, Շիրակի և Կարսի:

Կրթական գործը առանձնապէս խոստմնալից ապագայ էր ցոյց տալիս: Որոշուել էր 1920—21 ուս. տարում բանալ 1500 տարրական դպրոց, հիմնական բարեփոխութեան ենթարկել միջնակարգ կրթութիւնը, բանալ մի շարք մասնագիտական կրթարաններ: «Թիւրքահայ», «Ռուսահայ» դպրոցների դրութիւնը ջնջուած էր: Յունիս 21-ին կառավարութիւնը վճռեց Երևան փոխադրել համալսարանը, յատկացնել նրան նախկին Ուսուցչական Սեմինարիայի շէնքը, մշակել համալսարանի կանոնադրութիւնը, հրաւիրել նոր ուսուցչապետներ և այլն: Այդ նպատակով կազմուեց մի յանձնախումբ վարչապետից, հանրային կրթութեան ու խնամատարութեան նախարարներից և ակադ. Ա. Թամանեանից: Համալսարանը պիտի բացւէր հոկտ. 16-ին, 4 բաժիններով՝ պատմա-լեզուաբանական, իրաւաբանական, բնագիտական և